



英國志

二

U 9
3330
2



リ名
9930
2

其四



英國志卷之四

北藍大日柰朝

顯理第二紀

英國慕維廉譯

顯理第二是稱北藍大日柰朝其父若弗力恒以小樹枝置帽法人呼之為北藍大日柰
即以此前王顯理第一之外孫維廉第一之外曾孫也承父
 業有三地在法蘭西者一安如一買云一都來音其母之產
 卽諾部全地其妻之產波以都外亞幾坦地最大兼哥也納
 加斯哥尼等地及波多海口凡綜計自比加的至比里尼斯
 山視法地三之一較法王所治更廣矣士提反死立為英王
 亦為歐洲秉權之主其娶以利亞諾也貪其財產非敦琴瑟

之好宮闈後卒多故方英無王之時急欲渡海至英爲風所阻居於海濱者四十餘日後至國立其妻爲后其爲君也年富力強列邦之君無出其右臨事聰察欲盡改前朝弊政行慶施惠下及兆民以士提反之僭位而虐民也故重蘇其困士提反用他國之兵以自衛厚其資糧至是乃奪之斥令回籍向之營壘土地悉已恢復往時巴命所立營壘其一千一百所以爲民害者撤而空之小民玩視律法爲之修明百姓財用詐僞爲之整飭於時仁政大行開拓北鄙侵削蘇部蘇王不能報其弟爲亂於法部討而平之士路斯者法部中最富本亞爾之地帥師往襲之卒未有成功初王之臣有薦北

革於王前者王寵爲賓友後乃與王爲敵英人得仕於朝者自北革始其行事大有關於政教故史氏詳述之北革生於紀元一千一百十九年父本英人官舌力弗セリフ北革生而英敏儀狀俊偉父欲使之爲教士遣至本國倫敦及巴黎斯學中就讀穎悟非常兼習材武已有成人之度學成返國卽爲教士或薦於教大長視同列中有勝已者愈益精進務出其上再至法地教律國政無不暢曉出言有章心術機警教大長悅之使爲教長挾策干王王甚悅之授以蓋瑟勒之職品居第六大權在握遂升第一又爲王典機密與論大事外廷無知者北革名位旣高事權悉攬庶司百職奔走其門宮室居

處服用奢華出入呵殿儼如王者嘗至法蘭西法人見其儀從之盛喟然曰彼人臣也而如此英之王又將何如當王攻法蘭西時北革率羽林飲飛七百往親吹號筒奪其營壘而還教大長死王以任北革次教長欲得之出怨言謂彼曾事軍旅不應仍作導師又有深識之士知其機警密謂王曰此人出入將相受爵於朝王能制之若處以教長第一則君王之憂也王不聽召之自法蘭西回一千一百六十二年六月北革爲教大長盡改前狀凡隨侍之達官文武諭令悉去所畱役使者教中微賤數輩耳每日入堂勤于誦禱以財帛施濟所費與前略等自褫華服以麻衣從事飲水食粗糲露背

受笞其堅忍能自刻苦類如此所欲創立法制者使教中人與君民官吏分殊不受朝廷有司之法後人揆度北革所以盡改其生平行止者言人人殊有褒之者言其爲教長時實已痛悔前非以故省身克己不敢妄爲有疾之者言其一生詐僞以取大官及歸教中假面已去復爲謙下以冀人之信從又有言其素有卓識凡富貴利達之味彼已盡嘗以爲糟粕也而去之既掌教權極意爲人儀表以博己之大名論說紛紜有四事可證一王令教統於政北革宜蚤聞知身爲大長不使教士受朝廷律法雖其改制之意本非欺蔽朝廷而朝廷實爲所蔽二其君使爲大長彼掌教權一年改制紛紛

其心豈非預設成算而不以告君其爲不誠也可知三其刻苦謙下悔罪改過不過外示矜修至於中藏狡獪貪攬事權仍其前習也意謂改制易度務必度勢審時未爲教長無事改作旣爲卽改冀他日有變使人緣此歸已四北革自作教長已失君恩徧歷患難卒喪身命推其故皆因不使教統於政以此論之彼實有定力以持教體者也當是時北革已辭蓋瑟之職彼以朝廷顯爵不及教中品地也其君之意亦然王自法蘭西回北革往見之遇之漠然未幾遂顯與王爲難北革欲獨擅大權此事合於羅馬教例不合國中政令王堅拒之北革暫止然教中人有犯法者卒不令赴有司審理初

維廉第一設官行法時凡教會中人有罪自歸地方辦理羅馬教王自有律令後之教長恃權故創此議如此則教中人雖有巨惡有司不能問教長左袒不蔽其辜乃無忌憚之甚者矣有姦殺一案有司索之久北革言我教下人爾不宜問吾用我法下之獄黜其職如是而已其一千一百六十四年朝廷大臣暨諸教長議立約法十六章大意教中人有罪歸有司審理衆人皆允北革不可旣而始從之後之悔罪自責以此時誤從約法故也迨羅馬教主斥以爲非於是北革明目張膽首叛約法王聞之大怒召諸大臣勳爵會議且執教大長來訊之王盛氣以待北革殊從容身心泰然百姓環而

嘖嘖稱道王欲使辭大長之職諸教長亦然北革不肯辭甯辭身命不辭此職身披職衣至王所王退入內巴倫士教長咸入門啟雷塞斯德亞爾與衆巴倫出以會議爰書罪狀北革北革止之曰兒亞爾汝毋庸汝亦知余之事君以忠汝亦知余心不欲爲佞以結主恩汝亦知余爲教長國中三尺所不能加未爲教長受何職守此事不與汝言汝爲吾兒一切不當問汝汝等律令勿加於我有羅馬大教王在賴教王及教中人庇佑吾將去汝北革去朝廷議罰贖北革知衆將誅已潛衣他衣渡海往比利時於是北革之財產入官其家人戚族皆被

流徙北革在歐州衆遇之善羅馬教王尤厚待之拒絕格拉林等律卽約法十六章也如是紊亂無紀者數年後人有勸王在歐州與北革和法王主之一千一百七十年北革返國傲狠自是仍蹈故轍王聞之嘆曰余苦矣緣一教士使吾國人迄無甯宇誰能拯於憂患中乎有四巴倫士在王側聞之誓令北革毋得報怨此四人者以爲王授之權王實未知四人之意將不利于北革也四人各回營壘十二月二十九日率衆以往不持軍器好語北革勿報前怨弗聽爭辨不已乃返而取軍器時薄暮北革在會堂此時避禍誠易戚族亦勸之終弗聽四人者復來諭不從遂羣刃之北革死其不良

於死也自取之侮其意以爲舍身殉義則大相刺謬矣歐州之人聞之殊不能平國人怨王但謂其有意殺教大長則不然一千一百七十二年教王使者集議以王無心之過赦之惟語言歎息不殺北革北革由是以死乃令王至教大長墓前悔罪拜謝自後不甚以政統教矣北革爲教捐軀明年教王敕奉骸骨于會堂衆崇拜祀之垂數百年祭獻甚盛衆釀金以往會堂頗富殺教大長之四巴倫爲羅馬教王所斥絕後亦輸金求和夫政與教爭權一者不能偏勝人亦賴其不偏勝也而獲益無窮若王政有權則其君兼治教會威福於民徭繁賦重淫虐以逞或權在教長則罪

福予奪以強凌人教下非法官不能理惟政教相持不下地方百姓反得自主治其田產貿易及官司科約整有條理當是時王率兵至威爾士兵遭土人凌侮及再往得報前怨又征比利達尼以兵威強服之聞諾部取勝於阿爾蘭亦欲興師往收全地阿爾蘭與英國從古未通往昔本禮義之邦中更北狄變亂風俗頓衰人民粗獷時方造亂蓋此國名雖一君統治全土其實人各有部部各有長叛服不常間納貢賦旋即以兵犯上也王初年欲往征取羅馬教王亞德連此英人爲之始亦已下詔許之因事不果時連斯德部長爲其下所逐歸於王王欲仍立之一千一百六十九年遣兵前往明年再

往又明年王親征之十月十八日至阿爾蘭人見兵至望風而潰於是立其部長并服諸部然諸部長亦各有權治下以故英之法令止行於阿之首邑都伯林地如是者數百年英人既勝之後或遷阿地效其語言風俗亦一變而為獷悍矣王外事征伐而蕭牆之內夫婦相凌父子兄弟相殺后以利亞諾生三子長亦名顯理次名力查次名若弗力以利亞諾陰誘其子叛法王路易易蘇王維廉助之維廉躁急攻英北部為英將士所獲下之獄事定釋回不君其國願為英屬王在歐地征獲其子屢赦屢叛自其天倫乖戾骨肉相殘中懷憂憤鬱鬱成疾時惟少子名約翰者在側平生鍾愛亦不能孝

病益劇面壁長吁曰噫吾休矣王始卽位時意氣揚揚好大喜功貪得無厭及情隨事遷竿木收場不堪回首可見世間萬福皆虛也在位三十五年卒時五十七歲一千一百八十九年七月六日宋孝宗淳熙十五年也王久於其位大有造於百姓國中承平日久移風易俗典制一新為政先勞勿倦主德本勤往來巡歷鄰國驚以為飛時當更定律令昔時每有罪犯不承則嚴刑酷加或以毒藥令飲或以私門多枉死者於是當士師聽訟時令多人證其平素惡善名曰如力如力者令其人自誓不作謊語也一千一百七十七年法令所行之地或相遼隔於是分其地為六所有司周流巡歷一切

獄訟及民間疾苦胥於此聽斷慰勞焉王之末年倫敦始設買阿爾衙門管理民事此官由民選爲地方官之最貴者

力查弟一紀

顯理第二既卒長子力查第一卽位力查以倫序當立父死時身在法境後數月歸國無異言彼亦自悔其前之舉兵逆父也遷善改過以承遺業在法時使人告諭本國凡父之臣咸令在位大赦叛囚請其母后權當軍國事及卽位時紀元一千一百八十九年九月三日也忽行一慘戮之事古來猶太人之客於此土者或爲土人所侮訴於有司有損無益土人亦不甚窘逐之別立條例名曰猶太法其始有事令其多

輸財賄不傷肌膚至力查時尤有出於意外者歐洲及英人事故頻仍輒思興兵於耶路撒冷耶路撒冷者猶太京時已爲回教人所據欲往克之國人素輕猶太且以其人之售軍器於回人也尤嫉之猶太人流寓於此每遇喪亂多財爲患斯時尤甚國人欲往猶京需用浩繁必取盈於彼彼此相仇之故雖傳聞異辭此爲實事王亦欲往耶路撒冷與國人同心惡猶太人其在倫敦者禁之母入教院母近宮廷左右窺伺王者禮儀猶太人有不服者闖入朝適君臣筵宴左右大聲斥之猶太人奔而出國人見其狂奔也謂王將殺之羣起擊其人焚其居王聞之下令急止已無及

矣、此事聞於四境、亦起而攻猶太人之在其境者、王年少氣盛、喜習武事、及即位、人望而服其英雄、善用劍槊槍斧、自恃其能、時稱獅性、定例於扶達爾法外、更增一法曰室伐烈、凡出兵有田產者、必從征、爲軍將號其人曰柰的、麾下人衆以軍之多寡、知將之能否、民當散亂、不能求理於有司、輒藉軍士以爲衛柰的、後漸成會名曰柰的呼德、自此爲將者必先從同列學兵法律令、及登壇授甲、諸事始嫻、韜略爲衆所推、漸於本職事外、整頓民事、鋤強扶弱、有功政教、此等賢良名將、雖閒有之、未易數觀、此時將才粗鄙、未除厥後、駸駸日上矣、力查既能武事、及爲君、仍服身擺、示征回教也、紀元一千

一百年後、二百年中、屢興兵革、取耶路撒冷四鄰之地、國人勇氣百倍、將士由是益奮、軍將來自田間、從王敵愾、始終勿貳、田賦邱甲、義相維繫、其勇於勤王也、若此、夫兵凶戰危、本非王者之道、然亦不宜漫以加罪也、蓋自征耶路撒冷、而歐洲境土不爲回人所侵奪、又俾西人知東方輿地、爲益非淺、且軍將在本轄、每束縛其民、斯時東征不回、俾民息肩、暫獲其惠、紀元一千一百八十七年十月二十日、三攻耶路撒冷、回人幟樹於城、英王顯理弟二與法王非立、定謀伐之、顯理薨、而王繼其志、兵船錢糧、悉歸掌握、由是意張甚、凡庫藏存貯、罪犯蠲贖、諸項搜括靡遺、下令貸富人錢、鬻官爵土地、

蘇人輸銀願去前約自主其國許之師船既具以三教長掌
 邦政八德西治獄龍上尙璽其弟約翰掌王之土地一千一
 百八十九年冬王赴諾部命舟師繞行日巴拉大峽泊於馬
 賽爾士墨賽那海口明年夏會法王非立合兵十萬同行至
 來恩分兵法王抵然阿亞王至馬賽爾士期遇已之兵船而
 兵船行至比斯加灣遭風四散復聚於太克斯海口過日巴
 拉大峽至馬賽爾士王已前行尾之抵墨賽那帆檣大集萬
 眾踴躍既而二王不和又明年春法王率師先往耶路撒冷
 王猶駐墨賽那娶西班牙納瓦爾王女伯倫加略為妃妃母
 相隨同行至近耶路撒冷之居伯羅島遇回人與戰時法王

已先至圍亞克爾灣師老於猶京之地一年有四月奮力相
 持未獲寸土二國將校互相猜忌迄無成功乃與回酋薩拉
 丁盟許西教徒遊猶京拜墓焉王遂歸當時無他戰勝之事
 而數百年後聲名赫然其雄武可想見王之返國也欲速率
 從者微服而行渡亞得略的海北抵日耳曼為澳地利丟克
 里泊德所獲送至日耳曼王顯理第六所下獄四百二十餘
 日歐州人重賂日王得釋歸時國中大亂二教長爭權他人
 亦乘此構費約翰見事有可圖欲起而僭立使人流言其兄
 已死王歸聞之盡削其柄逐之出奔既而赦之左右以王之
 曾辱於囹圄也勸王增修國政以濯前恥然王復辟未幾即

往諾部不回在歐洲與法王非立戰以非立利已之久辱囹
圖又助其弟之覬覦得國也力查傷於兵或云約翰令人傷
之卒以傷重死時紀元一千一百九十九年四月宋甯宗慶
元四年也在位十年中惟四閱月居於英都

約翰紀

人言此後若法王選懦無能英王聰明特達則法當折而入
於英世世臣服矣如此歐洲西方成一太國英都法地過
岳皆屬土英之倫敦可為海口語音亦當變雜然而萬萬無
此事者法之先君愚闇至非立而英明英之先君英明至約
翰而愚闇也英雖立愚闇之主猶為自主之國當力查死時
欲傳位於其從子亞忒爾為比利達尼丟克乃力查長弟若
弗力之子也當是時先君之喪遽繼緒者倉猝未有定且君
位亦未定傳子之例亞忒爾年尚幼約翰已成入附之者衆
遂得立

一千一百九十九年五月二十七日約翰卽王位王所行不善爲英史中古來第一無道之主英史書其事分三類一與法王非立相戰一與羅馬教主相拒一與本國巴倫士相攻也初得國卽棄其妻取法部安若輪部長女名以薩伯拉者爲妃重行卽位禮其縱欲妄行如此初法王非立助王非出誠心旣而又助亞忒爾以小女妻之令之來攻以王非如先王力查之有獅性知其易與也無何王獲亞忒爾以從亞忒爾者下之英諾壘獄囚亞忒爾於法之路恩不知所終疑卒爲王所殺左右勲戚不義約翰而叛之國土削三之一非立欲執王就訊於有司王雖國主而有產在法部法人以爲屬

籍於我有司得治之使者至王亦使人于法願就訊惟欲得一路據保護道途非立許之王之使者曰吾君可安然而歸乎非立曰吾大臣羣議以爲可則可歸也其人曰吾君亦國之主也如國人不欲吾君之冒險而行何非立曰無傷也吾之臣下諾部丟克大勝爾英土其誰不知雖勲莫與京終爲吾臣汝之君奚恃而不來於是英王竟不至法之大臣議其罪重將盡收其地王不知勢如累卵怙惡弗悛國人咸怨皆有離心無肯禦他日之患者非立命速定約翰罪百姓亦惟恐不速也紀元一千二百三年法國有安如都來音買云三部歸法王後二年諾部自岔島外亦隸法上明年有地名薄

以都又入法界惟加斯哥尼哥也納二部尙爲英屬王怒法之日見侵思報之亦未有當居於路恩以待敵見法之戰士伊邇急退回英土海濱冀英人助已反侵地無應者約翰大怒繩其下欲罰田產八官不爲動其後國人稍稍思復侵地特以君之不德而失之亦不甚珍惜向之爲法爲英未有恒主今則竟爲法有矣英雖日見侵削衆庶益盛以諾部素反覆爲民害今茲他屬得相安於無事云是時王之太后死向例國有大喪或建堂禮拜或以財施教長而王濫恩貪利開獄縱囚盜竊咸赦惟異邦軍俘及猶太人不赦必使捐銀贖罪初猶太人冀王之卽位有恩例及縱欲妄爲國

用不足則拘猶太人下獄以索賄未幾綜計得捐贖項約金七十萬金值今銀四餅凡負猶太人債者王庇之卽命除其券王旣不德遇勝已之敵無能爲役凡人性懦弱時或強暴性迂緩時忽急遽卒之位不勝德而敢於狂傲者必不能久於其位貽羞於人耳此事見於王與教王相爭之時彼所求者理之當然惟取怨於民民不能助亦竟無可如何乃曲從教王以自貶損吁可怪也是時教王以諾森第三之權日廣英之教大長駐於干得不力者死教王欲定新例凡授斯職或歸干得城中會堂教士所選或從其部下教長所選會堂教士屬於教王部下教長願屬國主士提反郎登者會堂教

士也。教王使選爲教大長，王不知，欲別選一人，故怒逐教士，亦不許此教大長入境，且言吾何畏彼教王哉。一千二百八十年三月二十三日，教王下令暴其罪狀，國中會堂盡閉。如是者六年，初百姓甚畏教王之令，斯時不過爾爾，惟王之虐政日逞，民無所控爲患耳。此六年中，諸教士失職無俸，教王憤甚，徵他國兵來討，以英國爲教會中產，英王等於凡民之犯法者，不使預教會，并不許爲國主。初英之列王進奉財賄於教王，其人云：如下之奉，上英王必在教王下，實則不然。當薩朝時，蓋用以周濟教中貧乏者耳。教王下令於法王曰：汝往英國，逐約翰，則赦汝罪，命汝爲英國主。法王喜，率舟師攻英。

一千二百十三年三月，宋甯宗十八年，部署已定，王懼知國人之不附已也，王之爲人禍去，則驕心生，患至則跼蹐無所容。教王使者至，誅求無已，王唯唯慮法。王來攻，謂使者曰：願稱臣入貢，吾主爲大主，吾國爲屬國焉。教王許之，立誓書，王押尾署名，於是教王命法王非立勿攻英，非立不悅。王受約，東惟謹，國人恥之。教王以英國與法，此市井之道，雖一時令英王服屬，而貪得無厭，重斂於民，民尤苦之。教王之權由是漸衰，第三事變在王之末年。英史中最要之事，自古君無道，其位若何，民無良，其法若何，國之政事視君德爲盛衰，時一切刑罰禁令未歸畫一，王之權勢未有過於先君，而暴戾無

已令人望而生畏嘗遣人入民室廬預家人語諄細事其繁碎可鄙類如此與教王既和之後內難又作各部巴倫久以令甲爲不便因重立新法使君取於民民奉其上皆有限制一千二百十四年十一月二十日約議定衆巴倫共誓於教會堂將以兵脅王議不成將叛教大長郎登能從衆欲未嘗左祖王及教王明年春巴倫士使人持約法請於王王寢其事期以異日當決之由是上下相疑巴倫士陰勒部衆以伺非常王亦借兵他國欲平內亂王踰期不定巴倫士率兵至王所王得教王旨令臣下勿叛其君此吾愛子當勿犯犯必懲之王恃以無恐顯拒衆議衆怒叛去別立非子幹得爲主

作書與諸大臣合謀疾其君而右其民巴倫又與國人協力定計王有行營在諾但敦邑其民拒巴倫北德服邑開城納之五月十七日巴倫入倫敦民大悅王先已出奔寒諦爾從者日散後止衛士七人見勢已敗乃允衆請君臣相遇於命尼米爲達迷斯河南岸大合衆重定約法往復辯論經二十餘日紀元一千二百十五年六月十五日始核議十九日議定此名曰馬格那查達之約法言君賜民得自主也其六十一條言簡意顯法制咸定上不能虐其民君之威權自在下之裨益無窮財產身家得以自保矣此民自主之約流傳於後雖遇悍君更張其制百姓始而隱忍後必強人主俯從此約

此馬格那查達之約爲英民中流之砥柱至今我英民得自主尙賴此也首事者二人一教大長郎登一本不羅亞爾維廉教王聞之不悅令王勿從絕其人於教會王旣歸自溫折斯德亦思復仇悔約用他國兵力以脅之巴倫乞法王子來助國中大亂數月而王死時一千二百十六年十月十九日宋甯宗嘉定八年也在位十七載英自維廉第一以來亦有合甲惟易主易例初無定律每有事君民會議施行未嘗勒爲一書然亦緣此爲濫觴與英薩索尼朝前例異矣此法至今垂爲不刊之典後王九年馬格那查達之約太書於諸律法之上

顯理第三紀

顯理第三約翰長子其母卽以薩伯拉也約翰死後九日卽位年十歲尙幼以國事委亞爾維廉維廉清廉忠直以先王無道爲民所讐子幼臣下當悉心事之以禦外侮前與維廉同叛之人追咎約翰之惡曾乞法王子路易來英陰有推戴意國人不樂故依路易者漸少路易與維廉戰於林岡市敗又戰於多弗爾海上法人遣舟師助之維廉壞其舟於是路易之勢衰將去英與英人盟而歸繼其父爲法王一千二百二十年顯理再卽位以前此倉猝中儀簡而威輕也在位日久史冊無甚可紀之事王以童年得國懦而文弱往往爲人

所給惟和易近人人亦不以前事苛求之再卽位之前一年
亞爾維廉死凡王之起居讀誦皆溫折斯德教長彼得主之
法官之長有休伯者與彼得相仇挾少主盡攬大權彼得本
法人誘王信異邦人招致法人於其國授以要職休伯嘗仕
約翰不入于黨其佐王也欲尊主權惟不使逞虐王得此兩
人爲輔不甚喜約翰所定之律國人堅持之國人不喜教長
紛畱異邦人洶洶欲亂彼得懼禍棄官遊行東方休伯獨行
相事八年甚有政聲時一千二百二十四年至三十二年宋
甯宗嘉定十六年至理宗紹定四年也一千二百二十五年
法王路易取英地之在法者羅舌英人羣議於巴力門其始名議

會至此乃有是稱是亦新例新例中最關利害者巴力門能阻王者之欲
蓋財賦之權操於教長及巴倫士王不得妄用鎔銖也國人
大集休伯傳王言令巴力門輸金教長巴倫士言金固不吝
惟律法必有定而後可王可之此大律例自此每議納賦於
王必先奉行定律緣是增修國政巴力門布告於外稍有損
益至今奉爲一成不易之法累朝人主頗有依違巴力門卒
相持不下如是者凡三十二次而後定林藪之地新例任人
伐木藝植餘爲官地民入禽獵死罪茲亦未減時國人不喜
戰失地不能復一千二百三十年王率兵往無成前軍興積
欠復召巴力門別借以償前負巴力門不可逐休伯休伯無

他罪惟上之寵任太專已亦貪食相祿王復使人羅織之卒下獄田產入官繼相位者更不如前民追思之釋之出獄自此休伯無意於官爵矣時彼得已返國仇也王愈親貴之休伯之去益堅彼得繼爲相未久巴倫士咸嫉之以其仍輕已而用外人百姓怒甚逐異邦人之在位者出境王甚怏怏教長強之乃聽一千二百三十六年王娶法國不羅文斯部長女名以利亞諾至國從者如雲財賄繁費百職事有死者卽以授后之侍從先是國中男女私生子經巴力門議定若後男女旣爲夫婦此私生者得以承祧教中胥同此議惟亞爾巴倫不可時巴力門中教長人多此例卒不能成或謂與亞

爾巴倫羣聚一堂議不協同事不得定王爲異邦人挾制每被需索悉力以與取給於民民用怨咨常告貸於巴力門不可輒復哀祈國人謂之乞王無何猶太人有富者王誣以罪奪產入官以濟異邦人陽謂猶太人殺國中小兒於林岡城令徧搜猶太人財產盡沒之民怨日深且以羅馬教王之橫斂於民也怨之更深一千二百一十九年教王格勒格力第九詔令英國納稅十一緣征日部取爲軍需也民不堪命教長不得已如數獻之教王又令教會中除田土外器用財賄牲畜皆取其值五分之一後十六年法部來恩斯教會中有英教長言教王取英賦每歲納七十萬金有一歲

中取英地所產者半明年格勒格力死以諾森第四爲教王徵稅於英協濟國中及攻他國之軍餉王曲從教王之命故民怒教王且怨王如是數年賦繁政亂君德奢侈有時苟且求賄國人諫之自言願從約翰之法或諧之曰此巴力門所立之法使王之威柄下移斷不可從王是其所言一千二百五十七年王窘甚令巴力門籌議國人以君之庸闇而多求也且穀貴洶洶欲亂巴倫士以兵威劫王王懼願仍從前約巴倫士喜謂如此吾必佐爾以財於是君臣相約於阿斯佛會議時有法人西門莽福爲雷塞斯德亞爾本英出娶英王約翰女以來諾先爲本不羅亞爾長子婦早寡西門與王故

肺腑戚也一千二百五十八年六月十一日同至阿斯佛會議巴力門人等共議以君之或放肆邪侈不守舊章特設執政二十四人量才授任半命於君半舉於衆又每部有四柰的理民事卽民所推擇者大獄訟則上於此二十四人者蓋如此則上不敢虐以遇下下不至壅於上聞王子義德瓦的年十八亦遵此阿斯佛之約二十四執政中西門最貴重用事王之軍壘歸於本國人所轄異邦人之在王左右者去之新法與約翰大律法以法羅英三音書之頒示於國此時權漸移於議會矣會諸用事者議論不和王乘間潛乞教王赦其立法之誓遂背前約於是君臣上下齟齬爭論將起兵

端則願得法王路易第九來折定之以法王素稱正直能斷大事也法王言新法不可為訓惟大律法乃至公無弊蓋法王猶未盡知西門等諸人之意惟欲遵約翰大律法特以王之無信故復立阿斯佛新法不過牽制王之專擅行私而已及法王欲去二十四執政又不別授其下以權以此人不能從上下勢如水火遂相治兵巴倫士中頗有才略名重之人西門為大將英中土及東南皆屬所部王之黨惟諸異邦人及北方部長與蘇格蘭部王子義德瓦於從征時始有名一千二百六十四年夏四月十四日大戰於薩塞西門大勝獲王明日以義德瓦為質而求成西門行軍有紀律王就擒未

傷雖俘也猶敬禮之復其位自此國之大政咸決於西門別立盟約惟英人許出身至大官前大律法及林藪之例守勿失人主當尚節儉以前貸宜積且勿厲民病商又更新例國有大事教長及教外士各三人會議而行西門主國政一千二百六十四年十二月文書下諸部部民擇二人海口擇四人入巴力門會與諸世爵議事可否今謂之下院即今王與勞爾德士即今上院高門士即下院百姓三等會議之始也時一千二百六十五年正月二十二日集議議三十三日而定或謂西門與巴倫士此舉乃樹黨攬權之意亦未可知惟民之秀良者得參預公事約翰舊律守其成憲毋有悖戾西門

雖未親睹立法之效實爲英士古今善政卽中國上古官天下之道也凡人由卑賤躡等至貴顯雖有善政儕類中病其越已而上猜忍無已不啻剗刃而後快西門以亞爾起家驟貴當國卒及於難有格羅斯德爾比二亞爾等共起兵間亦非有異同特不平西門之手握大權也作書慰安義德瓦以計釋之去於是義德瓦舉義旗於薩落聲言若返國誓依約翰律異邦人毋得處吾境士凡國中材武之士咸往赴之時西門之精兵散居四處西門在希耳佛王聞義德兵起欲與西門長子連兵拒之其長子先與義德戰大敗西門見義德勤而能兵兵強盛不忍見其子之旗在敵中又見前與共

事之人其旗亦在敵中俱已助敵知勢不支八月四日戰西門死死傷甚衆殺將校一百八十人義德軍中無一憐之者支解西門之尸禁人收葬百姓哀之於是王再卽位仍遵約翰法民氣得伸義德主國政仍聽高門士有權亂甫定義德與法王路易有進征猶京之役出國門未幾王殂時一千二百七十二年十一月十六日宋度宗咸淳七年也在位五十六年

義德瓦的弟一紀

顯理死四日國人遙立義德瓦爲王王生於一千二百三十九年娶西班牙王加斯的弗的難第三之女名以利亞諾與

之同往猶京途次聞父死不遽返至法之哥也納部居於彼
二年以國之無事也後一千二百七十四年七月二日偕后
返國十九日卽位王在中年血氣方剛好武有英雄概國人
知其必有開邊之舉特王不欲吞歐土而規畫北方蘇格蘭
俾號令出於一王先征威爾士與英接壤處當諾部人爲英
王時封巴倫士部長於此巴倫士陰蓄士卒蠶食土地每得
一地稍有獻於王王喜巴倫得加封王亦得地令築壘於彼
南威爾士海濱咸屬於英遂築一道直抵阿爾蘭北威爾士
其王尙得自主英人謂昔薩森人爲王時爾曾遣人臣服於
我北威爾士內亂遂折而入於英王立未幾威部主雷威林

叛英英巴力門會議以其逆命宜討之輸金於王出師往戰
將戰英人誘威爾士人使自相攜貳又使人說其部長無聽
主命無何咸屬咸衅其弟大非亦納內款王建旗於威爾士
邊界以旌厥功時一千二百七十七年宋恭宗德祐二年也
軍容甚盛直攻威部內地兵圍日久飢困無聊雷威林於是
乞降義德令威全地屬英指揮無許自專山中頑民負其險
固始雖暫服王虐之遂叛大非旣降後悔之亟思報仇一千
二百八十二年第三月二十日夜暴風揚沙大非率衆突入
英哈瓦丁營劫殺無算擄其長吏囚於山巔雷威林訶知此
事起兵應之各部衆逐英所置長吏反者四起王親征威衆

披靡雷威林死於戰陳衆乞降大非竄於荒谷爲人所賣卒見殺賜出於刃支解之於是威爾士遂爲英地時英之法度恩澤尙未克逮由漸而化俟之異日平威爾士之三年義德駐威爾士后生第二子宜嗣王位號威爾士王子冀後日得立爲王也議會集於威都始定英之克有威士至英王顯理第八時威人得推舉議士入巴力門英民自主之律亦行於威顧威猶未誠服至若爾日第二在位之二十年始命以英之律法全施於威王恒在他邦鄰國有事爲往來作調人者三年一千二百八十九年元世祖至元二十四年英國大亂法制盡紊弛其約束政以賄成義德歸大怒召法司至巴力

門會訊定擬除兩人罪輕不問外餘悉褫職并罰鍰贖罪罰贖之弊義德往往行之而弗公凡巴倫士蠶食國土義德命盡出其契其強有力者撫劍疾視有死不從柔而可制者必隱忍納賄而後已猶太寄籍人當義德初卽位時田土已爲所侵復誣爲剪蝕盜鑄金銀錢文罪犯至重重罰乃已至是知猶太人之產已盡下令盡逐猶太人出境否則殺無赦猶太男女痛哭相扶攜而去者一萬六千五百十一人資斧乏絕土地金寶盡沒於英自此猶太人絕蹟至高門空時始復見於英王又謀滅蘇格蘭以蘇之密邇於英也汰侈不已卒及於難王之初年蘇國最盛蘇王名亞力山大第三中年嗣

統娶王之女兄弟申以盟誓世世子孫迭爲婚媾無何天降災禍於其君民用愁苦蘇王之后死其子亦死其女爲諾威國后又死蘇王爲國本計復娶后未幾乘馬墜崖死一女孫諾威后所出當立義德欲以其子娶此女其聽蘇國之政北方巴倫士聞之喜一千二百九十年七月爰立盟誓俾弭爭端安上全下莫善乎此乃蘇女自諾威來道病死義德本與其后偕來至是疾馳赴蘇而蘇已有大臣居攝且聞己之后以利亞諾病駐不前進以利亞諾死王伉儷情深凡殉葬器具服式俱極豐美費不貲臨穴灑涕哀感路人自此以後王志在開疆終不能釋然於蘇蘇自二王以下皆無子王之疏

族皆來爭國有二人尤甚一巴略一普魯斯皆部長也國人怨干戈之動邦內蕭然乞英王兩解之而立一君以奉蘇祀而英王以立君爲功威福自擅將使蘇爲英屬國焉時蘇國已有數部服英蘇王威林當顯理第二時出自獄中立盟約爲不能自主之國迨後納賂於力查第一棄前約一千二百九十一年五月十日兩國界上有一小市名諾汗王使人與蘇之大臣議立君之後蘇爲英屬蘇人恐民受兵燹暫滿其欲然王之意欲蘇地永屬於我使蘇人早見及此必不肯從矣明年十一月十七日立巴略爲蘇王重定誓書巴略不得民心王亦不善遇巴略旣而威爾士叛王率師與法王非立

戰於是蘇人背約自主一千二百九十六年英遣步卒三萬精騎四千往征之戰於登巴蘇人大敗英師深入巴略爾舉國以降遷於倫敦英之將士往戍其地蘇王服御咸歸於英自此蘇人將永爲英屬矣一千二百九十七年蘇有維廉瓦拉斯者有名於時起兵敗英之大將壞英壘英人之爲蘇長吏者盡逐之英遣兵復仇國人不助瓦拉斯瓦拉斯逃於無人境既而仍出爲寇英師老糧盡而還故佛的河以北未降於英後歷四載無事王將娶法王女瑪伽勒教王以書來諭勿凌小國英所失之哥也納地謀復得一千三百三年時蘇之叛者盡殲惟瓦拉斯負固未幾土人給之見獲於英英人

殺之王思大功垂成將頒律令以靖國人未果事變又起乃普魯斯之孫亦名普魯斯結壯士舉義旗蘇衆助之立以爲王王聞之懼已之普得地復失極力支持然年老無能爲役矣率師前來望見蘇地而王死年六十九在位三十五年時一千三百七年七月七日元成宗十一年也王雖頻年征戰民力已罄而政事法制頗甚可觀升蓋瑟勒爲首輔國有大獄咸聽斷焉民選議士至京會議長吏毋得挾制其始有事君取於民往往抑勒謂民之莫敢誰何也厥後民不堪命及遣二亞爾一波亨一畢格的出征哥也納其人不往怒而欲殺之其人曰不往亦不能殺蓋王亦無如何也一千二百九

十七年及一千三百六六年中立一大法曰底大拉日疴去王
王徵賦稅而不由巴力門議定之弊也此法後王輒依違國
人則視爲根本以此法大意謂納賦於王權自民操也斯去
亞的朝不行此法民乃大亂國以傾覆

義德瓦第二紀

英之巴倫士集於加來爾議出兵聞義德死明日立其子爲
王號義德瓦第二父爲英雄子一庸庸者耳先王臨死屬以
必伐蘇國載其屍帥兵前行直抵蘇之北境然過蘇英之界
卽回散遣軍士自歸倫敦喜爲父所不爲之事召其少年狎
昵之臣法人克弗斯敦昔爲其父所逐乃復其位寵任之甚

至王離英都往法地娶法王小女以薩泊拉以國政盡委於
克弗法女性淫以王之不與如近也所爲多不道新王內不
見答於其如外不見信於其民不能齊家民受其害至於終
極遂及于禍王之在位不思爲政惟嬉戲淫昏是務以大權
授近習國之大臣益不能平當卽位時羣臣上冕以次序立
克弗立近王前手奉厥冕大臣愈怒克弗王授以高奴瓦亞
爾娶王弟之女獲產甚豐恃才而驕每呼大臣以流俗猥談
各爲品目大臣咸怒乃立一會巴力門共議更張朝政肅治
宮闈逐克弗出境如回卽殺之而巴力門每歲一會宰輔必
由巴倫士在巴力門議會中會推義德不悅必欲赦克弗仍

執國柄國人譁遂逐克弗既而王以事不由已召克弗還反其田宅復其官位如初巴倫士乃自立爲一會教大長咸在誓守前法蘭加斯德亞爾主之其人爲英王顯理第三之孫國中最貴者時王在英北境紐加斯爾國人佯爲遊戲兵士持器械揚言逐讎其實將襲王所在王聞之與克弗往帶音謀留其后居之與克弗俱往斯加不羅中有堅壁令克弗居守而自往約克糾兵國人圍斯加不羅克弗以其地降言他時有變乞以此地活我本不羅亞爾薩勒亞爾等許之遂見俘於本不羅欲攜往本營夜宿於他壘命人守之天明爲瓦威克亞爾取去至其營薩勒蘭加斯德希耳佛諸巴倫會議

有欲赦之者衆中忽有言曰此人如狐狸舍之將重獵耶於是定議殺之克弗死王聞之心懷憤恨仇視衆人誓他日有事必盡誅以爲快于是歐洲各國土豪之事起歐有羣惡少年爲奈的敦不拉士奈的即軍士敦不拉士言防護殿堂者好勇任俠作橫鄉里始於紀元一千一百十八年宋徽宗十八年有奈的九人結黨立誓巡行耶路撒冷左右防護行旅往來借客報仇睚眦立決既而諸邦貴人漸入其黨或勇或謀黨日以興或助以產黨日以富首稱大豪人莫能治每至教會聲勢出王之使者上各國俱有一大豪爲首領英之首領國中會議必聽之爲政其人驕侈無度一千二百九十一年回人據奪

猶京全地。歐人漸惡此輩，將棄而不用。教會中羣嫉之，以其富而驕也。王者度支不足，彼乃富有二萬八千家之地，厚殖府怨，勢日岌岌。法王非立謀誅之，教王格力門第五復為祝福。一千三百七年，潛遣人捕獲之，數其罪刑，訊而服，產盡入官。明年，英王亦收其國中，大豪初未桎梏，後從教王令，加以楚毒。一千三百十三年，歐州諸土豪遭焚戮，或死於壘獄。於是教王下令各國，盡滅其種。普魯斯者，蘇王也，思收英權於已國，克復軍壘，駐兵南界，據之以懼英。凡蘇部英悉置將校，此時望風而降。惟斯德林壘未下，將校嘆曰：吾王不來，我不能守矣。一千三百十四年，王聞蘇人叛，甚慚，欲立功以解於

民，率師往救之。蘇人稍退，英過界北，將至斯德林，次於板納。蘇王普魯斯勒兵以待，西曆六月二十三日，日加未兵始交。明日又戰，大敗英人。蘇王能兵，兵少而精，英雖衆，無所用之。英王奔於登巴，諸巴侖或降，或逃，或死。英之軍資器械悉為蘇有。蘇人益恣遊奕，英之北境往來劫掠，嗾阿爾蘭叛。英及蘇平立誓書，蘇王自主其國。時英之禍患頻仍，人民愁慘，追咎兵端，復值飢饉。初年歲稍歉，明年大風雨，禾稼盡拔，民食惡，食疾疫遂生，國中擾亂。英王不知悔過，寵任匪人大權，旁落德斯奔邑者，故世家子，與其父相繼當克弗斯敦之職，非有凶德，惟權勢太甚，人咸妬之。蘭加斯德亞爾首樹一幟。

諸巴侖助之，昌言於朝，必逐德斯父子。初，蘭加既誅克弗，威名大著，後朝野無事，意氣漸衰，懼事不諧，陰召蘇人來助。國人惡之，英王使人乘其不備，率兵掩捕，蘭加與其黨皆就擒。有死者，王於是始報殺克弗之怨。雖王之戚族，引出斬之。殺巴侖十四人，柰的十四人，餘並下之獄。或得脫奔他國，王雖大行誅殺，民心不服，其快於意也。亦暫耳。王后以薩伯拉見王之多行不義也，弗加敬禮，王亦不愛，厥后妃匹之分已乖。以薩詭言於王，將返法地，議國事實欲去英而大歸也。途遇諸巴侖時，方在亡中，有一亞爾曰：邈的麥以薩與之俱，言笑相得，遂通焉。謀廢英王而篡其國王之使者二人，在法一根。

的亞爾，王之弟也。一利智門亦王戚屬，相與同謀，逐其君，以薩率其子及諸人同抵英倫。時一千三百二十六年九月二十四日，元順帝十八年也。教長巴侖國人咸會，王勢孤力屈，出奔英之西境，德斯奔色，遺產在焉。其父逃至不力斯達城，有縛之解至。后前年已九十，為后所縊，其幼子亦死之。王始逃於山中，後出投誠於其后，未幾死。不力斯達人欲立王子，亦名義德瓦為王。一千三百二十七年正月七日，召巴力門會議。時英史初有逐君之事故，必詢謀僉同而後可。廷議曰：大臣傳事者不在列，教長阿爾敦厲聲問曰：汝等欲以其父為王乎？抑以其子乎？無一人言仍立故王者。有一巴侖德拉

色從者數人以巴力門之命弗附故王斥王爲庶人王奴事其後瑣尾流離是歲九月二十日元英宗至治三年死於所居之地時有人言夜聞呼聲甚慘莫有拯者後邈的麥自言我實使人殺之后亦與聞弒君百姓猶未知以薩伯拉淫亂事如知之必佐其舊君返國復仇義德此時殺身之事未明後終洩其冤英史書此王在位時授民以大權君欲罪巴侖必問高門士巴侖欲叛其君亦必問高門士法令制度出於王必合教長亞爾巴侖及高門士議成之否則不行英民得與聞國政自此始也當是時巴侖士之大者爲亞爾有田產及屬下甚多無產而有聲于時者王召入巴力門上院亦稱

巴侖先是召入議會以敵亞爾廢置不常至是乃爲世爵視中國男爵其次者漸降爲高門士舌力弗舊爲國人推舉今歸王及大臣選授始造刑例王在位之十四年始有世爵之稱

義德第三紀

義德第三生於紀元一千三百十二年其父見廢立之爲王年十五大臣以其未弱冠代之爲政中外大權稟於以薩太后每歲巴力門貢太后金二萬以邈的麥爲馬爾智亞爾德斯奔色入官之產大半與之明年王娶荷蘭部長維廉之女名非力巴一千三百三十年生一子及長甚有名譽甲仗衣

械尙黑俗呼黑王子時王年十八欲親政不使太后及邈的
麥侵權時國人亦聞此二人淫亂早惡之根的亞爾今王之
叔也邈的麥誘之從惡人遊誣爲結黨謀反誅之籍其產國
人愈惡之此欲固其寵更速其危者也十月巴力門集議於
諾定昂中有行殿以薩太后居之邈的麥侍左右太后夜必
自掌其門鑰恐人之襲之也王遣士潛由地道入執邈的麥
明日王下令重行卽位禮召巴力門至倫敦共議邈的麥之
罪以其弑君大逆立梟斬之王不欲顯其母之惡惟輟其歲
俸禁錮終身王在位戰必勝攻必克甲兵堅利士馬騰驤威
加海內然孤人之子寡人之妻暴骨以逞亦已甚矣雖佳兵

不祥然功德在民斯爲可貴耳王之初政雖有可觀至末年
得法地如獲石田而國已空虛矣蘇王普魯斯死其子大非
第二尙幼亦有大臣輔政英蘇又交惡英王率兵至邊界助
蘇人巴略謀篡其主巴略謂英王曰王若助我請舉國內附
於是英人攻北威克北威克蘇之關隘也城垂下而蘇之執
政來救之英人結陣於高原四面環水攻之甚難蘇人來戰
大敗之遂降其城一千三百三十三年七月英人立巴略爲
王而去大非遁於法蘭西王出兵以來屢獲全勝好大喜功
謀吞法蘭西用兵南方無暇北顧於是蘇得息肩乘間召大
非於法仍立之爲王王欲嗣法國之統於理未合英太后爲

法王非立第四女非立第四死其弟路易第十非立第五查爾斯第四相繼即位俱死無子有女法國之例女不踐祚一千三百二十八年王死無嗣考其譜系宜擇宗族為主瓦羅義斯非立乃非立第四之猶子於序當立國人說之王既欲為法王然有地在法境地名亞幾坦故其始稱臣於非立後將戰人詰之曰余年少不得已也又曰爾國特無女王女之子不可為王乎余為非立第四之孫與其授國於姪甯授國於孫王之意則然其母不宜立其子反宜立耶且如此則路易第十非立第五各有女女各有子其子不較王尤當立耶故王之所願終虛法人終以瓦羅義斯非立之得立為正其位

遂定一千三百三十七年元文宗致順二年英王遂自稱法王造法王璽書自此二國日尋干戈王乞師於列國而非立亦有鄰封助之英人喜其君之有威略高門士貢銀饌一千三百三十八年英出師攻法經比利斯之旁邑不下明年兵過法境劫掠一空明年英人復踰比利斯攻法又明年法王聚舟師於海上截之王即提兵水戰大敗法人英人死者四千法喪三萬人國勢甚蹙英人帥他國之師同入法之內地非立懼堅壁不戰欲老英師英果糧盡而返王歸國大詬其臣前借民餉謀歸之民以吾君有戰事雖非例相求無怨言客兵無益乃籍民兵時法人取哥也納英人救之一千三百

四十六年夏王率其子黑王子攻法王子年十五有封地得能名兵三萬渡海至諾部諾不設備大肆焚掠王率兵至南方塞納河側圍巴黎斯城法王非立以勁兵出禦之斷其歸路英人繞道仍回比利斯法人大出師追之義德見已兵在前欲與法決一勝負駐師格利西兵分三隊一黑王子將之凡丟克馬貴斯之子及亞爾長子均號勞爾德一亞倫德諾坦敦二亞爾將之一王自將之王親巡軍勉以忠義軍士益奮稍食坐以待敵法兵至英人望其甚衆心畏之是日日蝕大雷雨及兵交日加申忽天宇開霽大敗法人法人之來也速兵有未訓練者是以甚敗死者三萬七千餘人

列邦之君及諸大臣多有死者法王夜奔至一壘名北雷軍校聞即門聲甚急出問之乃王也識其聲納之是日非立提十萬兵出戰其入也從者五人後五日英人攻加勒斯法之北鄙也非立收募新卒召其子約翰於諾部前此帥師禦敵於哥也納者令撤兵來助又使人說蘇王大非來侵英境王聞有北寇以師退法人嫁禍於蘇蘇不知而聽之蘇王南下爲英北候所獲置之獄中英攻加勒斯日久城堅不可入築長壘圍之絕其餉道城中人食盡被圍近一載兵殺犬馬爲食守城將欲降遣人謁英王乞弗殺弗奴英王曰汝欲降則降無多言汝宜令親信六人免冠徒跣縲紲持城中管鑰泥

首軍門則貸汝城中人無可柰何諸父老隨六人者往英寨乞命英王后非力巴爲之請乃免自此加勒斯及其旁邑爲英屬者且二百年于是英法二國議和罷兵歷六年法王非立死子約翰立庸主也英王旣降哥也納加勒斯威名日熾遠近頌之旣而上天降災疫癘流行一千三百四十八年地震歐洲中土及其南境英地不震而大雨滂沱田產盡沒旣全州大疫俗名黑死歐洲死者二千五百萬人此病與絞腸霍亂俱來自亞西亞漸西由蘇格蘭北境至哥林蘭而諾威流寓於此之民盡死貧者衣食不給染此病尤易倫敦大都一日夜死二百人其死十萬人地不產物物價益昂民無聊生白晝劫盜官不爲理富者恐

或沾染棄其僕役流離道左貴人閉門靜養不與人接民無所得食君相下令周恤無奉行者具文而已英法二王暫和六年然亦不能踐約於是英王欲立永約不君於法惟已地在法境者主之法人不可一千三百五十五年再啟兵端英王居守其子黑王子主兵事英人蠶食蘇之南鄙修怨於蘇又欲得蘇叛人巴略僞許之地黑王子率師六萬攻波爾多至比里尼斯繞行向北抵土魯斯大掠子女玉帛而歸凡五十日焚掠邑市村落五百所明年黑王子復出師每至法

境民遭荼毒法王約翰與師問罪民怨英人莫有洩其軍情於敵者九月十七日英前鋒與法之後軍遇明日兩君文告往來終難罷兵又明日大戰於波爾多約翰兵勢甚盛人意黑王子必被擒英師必敗北矣黑王子能軍深溝高壘先機蓄銳戰士思奮慮無不一以當百法人恃衆而驕師不以律及戰法之前軍稍卻陳動入後隊後隊亂遂奔不能止英人乘之大敗法人獲約翰與其太子及公卿大臣凡法之被俘者多於英之戰士慮難制索重賂而釋之是年冬黑王子駐於波爾多與法王子非立約兩國罷兵以二年爲期法自約翰被擄之後非立監國黑王子歸英威名大震將相以下郊

迎長驅入國獻俘於朝下約翰於獄蘇王大非於一千三百五十七年秋納賄返國或謂英王與之約汝無子汝死我之子嗣汝及大非死國人不欲立英王之子議遂寢嗣大非位者名斯丟亞的自主其國歷二百年其裔爲英王一千三百六十年約翰自英歸於法和議成故也英王不樂聽法政前諾曼北藍大日奈朝有地在法境者英王仍歸之於法惟亞幾坦加斯哥宜之地屬於英盟約既立法人中有不從者約翰懼討且國已有君歸於英之倫敦遂死於此時一千三百六十四年春元順帝至正十八年也英黑王子封於哥也納兼旁數邑波都以爲治所與其弟蘭加斯德丟克同居生子

力查後爲英王西班牙之加斯的部有叛人名此得羅謀篡西王之位黑王子助之兵至比里尼斯山南戰而大勝立比得羅而歸歸而病作庫藏空虛比得羅許得國當賂以原賄既而背之重斂於民民用不協黑王子病臥法境王居倫敦年亦衰邁於是法王查爾斯第五乘釁起兵復仇以攻城築壘爲事未嘗對敵野戰英王聞警遣兵助黑王子王子病劇以兵付部將已回英養病於路盡掠利麻日斯殺老稚男女三千人前所得法地盡失惟加勒斯尙爲英守英產在法境者惟波爾多一二邑而已一千三百七十四年法英相約暫和罷兵先是英后非力巴死國人思慕無已英法罷兵後二

年黑王子死國事日衰國人誚讓王之用兵以病民王又老荒溺於愛寵其宮人伯勒士賣官鬻爵王迄不悟以至於死時一千三百七十七年明太祖洪武十三年也年六十五在位五十一年王於列邦中爲雄主好武性成立一勳格曰加爾德爲將校勸服式擬於王者大興土木宮殿巍峩卽今之制也雖多取於民然民有冤抑每得昭雪以故人心樂輸在位日舉議會七十次散會甚速內商國政外敵強鄰巴力門於是乎有權凡軍國大事先諮之高門士高門士上之公卿大臣當是時巴力門始於一千三百三十一年分兩院先時勞爾德士與高門士共聚一處東西列至是勞爾德士號上

院高門士號下院民有獻納官有黜陟悉仰其成謀叛之律始定法司不得妄陷人罪又定數律奪教王之權教王不得濫索金帛強取教長俸食奸民不得赴愬於教王巴力門議嗣後若有羅馬人滋擾地方者殺無赦蓋瑟勒爾始不用教士一千三百七十七年巴力門議會始於高門士中擇一人為斯比格爾凡會中事皆自于彼而代言于王有味格力弗者名教士也博極羣書掌書院當英大疫時心甚惻然見羅馬教會之專擅無禮也以為此異端惑眾邪說誣民昌言於人責其以詐偽取人並無獲益始僅呵其同列教士後乃指斥其國中教大長著書痛詆之不遺餘力願家喻戶曉勿為異端所惑眾教

士恐其說遂滋大不便於私乃大會羣士召味格至會堂相與論別是非國人環而觀者如堵倫敦教大長坐高座大聲呵責勢咄咄甚迫幸公卿大人素服味格之為人防護頗周眾雖切齒莫可誰何論不決而罷

力查第二紀

黑王子有數子，早卒，後生子尚幼，義德死，黑王子先死，故國人立其長孫，號曰力查第二，時一千三百七十七年七月十六日也。年十一，國人以其父之威名，故愛其子，上下無間言及長，失百姓望，為政始勤，終惰，親愛失當，又欲去巴力門之權，以此不協於民，民遂廢之。其在位也，王叔三人共執大政，一約翰為蘭加斯德，丟克一義德門，堪比日亞爾，後為約克，丟克一伯京恒亞爾，後為格羅斯德，丟克義德以軍旅之事貽其後嗣，法人見英主幼，背前約起兵來攻，又說蘇王使攻其北，英之軍政主於大將，防守無策，軍需甚繁，英有三地在

法境者，招之使叛，一加勒斯，一波多，一巴約宜，犒賞甚鉅，王以軍需孔亟，令民間案戶籍，丁計口出錢，巴力門不可繼，乃暫許一千三百八十年，英人盡叛，英民有二，一奴，一良民，良民者，奴之裔也，其故有四，一主臨終，釋之令去，一奴自以錢贖身去，一逃至遠方，道梗主不能追，一舊例，逃奴踰一歲，其主不追捕，即許自主，故先奴後良民，英法皆然，自一千三百年至四百年，此百年中，大有變易，時猶未有定律，釋放諸奴，叛民隸奴籍者尤多，每主貧鬻產，奴亦隨之，他主遇之若牛馬，奴雖勤亦無所得，辱則無可訴，英稍愈於法，而人心之願望無窮，奴欲免而為良民，訟其主，有司往往抑之，而為良民

者安居樂業有事則遣高門士達於王所奴籍之民且妬且恨時教士示民以厥初同一本原未日同一審判當日有司虐民以逞民愈不堪計口出錢不論男女十五以上數百文有司必欲取盈民畏輸征輒匿年以故其數常絀官又嚴比一千三百八十一年英之東方三地諾佛薩佛厄塞先叛叛首斯得老倡亂行劫殺其法司加文的使根的之叛有公役勒索口錢甚急入一幼女室強逼之其父瓦的代勒怒手刃公役百姓快之推以為首而叛南北方民間者響應代勒率羣無聊之民凡六萬進攻倫敦教士包爾為之謀主以人元來無有貧富貴賤律法亦

宜然以令其下將盡滅富貴家兵入倫敦釋囚劫庫殺傷甚眾其始叛首佯約束軍中勿掠英之城守不及備故及於難六月十四日王帥眾入壘厄塞黑耳佛共率叛人至王出招撫之叛人言願去奴籍後世子孫得為良民勿禁越境使得貿易四方赦其叛逆均其賦稅如許則就撫然均稅一事地有肥瘠未合於理事間英王盡許施行書詔令刊板諭眾叛者始退根的叛人伺英王他出入其營掩獲文武大臣教大長色德白列兼執政逢君之惡民惡之甚執而殺之明日英王至召叛首代勒及其眾議撫諸將校見代勒身佩匕首懼傷及王一人以梃擊之一人自後踣之遂殺代勒羣叛者洵

海張弓四起王見事急馳馬至衆前好語謂之曰吾卽若主也若勿患無主若勿反叛者不意王猝至惶惑失措又慮王之衛士將至遂不敢動王與叛者徘徊郊野間若有所俟適一柰的腦爾士率千人至王所王大喜諸將士相繼亦至其四萬人叛者懼各鳥獸散不能脫身而就誅者千五百餘人於是前日之赦令遽止土著者毋許擅離年滿二十卽力田勿習他藝小民更受上虐矣奴籍之民數百年陷於羅網至是始洩其憤富家已慘遭荼毒英王年僅十五戡此大亂百姓驚歎謂王春秋鼎盛異日不知若何英明後漸失德民益怨之一千三百八十二年王娶波希米女安爲后賢后也信

味格力弗之道其姑王太后以是訓之也后振興善教移風易俗愛民如子允稱國母從者自波希米來亦從其道回至歐洲以味格之書分贈同儕有約翰黑斯者甚著名譽讀是書而愛之教施弗倦後爲人所殺先是教會中訟味格之道欲害之太后力爲庇護及波希米后來歸味格之獄又起教大長哥的尼新事集衆於倫敦議此事斥味格爲異端稟於教王使者令國中務滅此異端凡教會中所惡於味格者以爭教中晚餐事又味格以教會中告解一事爲非理教長食俸亦非理而教會中人謂教王必無過失天下萬國宜奉一教王爲主味格皆以爲不

然又教會中無論貴賤罪惡無論輕重地方有司俱不能問
味格更以爲不可坐是逐味格出大書院毋許教授於人其
得免於刑僇也以是時有二教王爭權英亦多故左右有力
者庇之故也後二年味格死後三十年教會中餘怒未息斬
棺焚尸揚其灰於溪流識者謂此灰自溪入河自河入海入
洋猶味格之道其始行之者甚少至於今而天下咸被其教
矣王爲人寬和泛愛所寵任者推心置腹然服用奢侈號令
不一且信讒言是以上下離心人各爲私災害並至維爾者
阿斯佛亞爾後爲阿爾蘭丟克頗專國柄阿爾蘭賦稅大半
納於維爾王之宗親嫉之薄爾者商人之子官至蓋瑟勒兼

薩佛亞爾又有德錫連爲刑官長此三人者性行無良共掌
大政政用不減南有法北有蘇日尋干戈徵餉無度斂怨於
民於是王之叔父三人與諸巴倫士議逐維爾等而蘭加斯
德丟克約翰以其妻故欲爲君於加斯的其二弟一爲格羅
斯德丟克一爲約克丟克其子名顯理爲德爾比亞爾後爲
黑耳佛丟克三人合謀去君側之惡一千三百八十六年國
人議逐三奸王不聽大臣固請曰汝不逐彼民將逐汝王不
得已逐之高門士議薄爾之罪既而釋之又議兩院立會共
掌國政一年格羅當國明年王年二十思自強於力反前
議恨已在國中如綴旒也德錫連謀立一法復王之權召同

列往諾定昂同列既至出條例一紙令署名於下凡近議章程盡廢巴力門之柄盡落後有大事悉從君命同列見之遲疑未決王及諸大臣教長等勸之乃從王以此議已定速往倫敦六轡在手私心甚喜此事聞于倫敦格羅率羣臣迎於城門嚴查行李獲有新立條例者目爲奸臣王亦無如何明年巴力門堅欲誅首謀者德錫連被殺餘渡海逃去同列有貶者明年王始親政又明年王以奇計奪用事者柄時議北方大事王忽謂格羅曰子年幾何矣對曰主君之年二十有二王曰若此則余年長矣歲月逝矣謹謝諸勲貴此後可無煩公等矣格羅默然而退於是主威日振臣權日失其致此

之由莫得而詳後數年國中無事蘭加斯德丟克返英倫王見之甚恭與二王叔及諸大臣皆無異言然面同而心異也王特下令諭民吾春秋日富國中政事大小咸決於我一千三百九十四年王后死無子王傷悼不已乃下令出兵討阿爾蘭之叛者以釋其悲後二年聘法王幼女以薩伯拉又明年王始嗜殺討羣臣之罪謀頗詭秘召瓦威克亞爾食而執之召亞倫得亞爾議政亦執之一日王突至格羅斯德壘呼其妻爲叔母而拜之陽以好語相問慰出不意挾格羅下一小舟押往加勒斯安置詔有司令民間慎選高門士至都會議必遵王旨無得自專事定殺亞倫得流瓦威克於異邦召

格羅於加勒斯司刑者報已死獄中不知其死狀然必殺之無疑也王報怨甚至而與其謀者爲顯理其始黨於格羅既而背之此儉王之尤者巴力門折節奉事王日益驕貴又謬言諾定恒之條例當於理至公無弊自是國中氈裘之稅悉歸王議者以爲此事貽害子孫議會將散推十八人董其事上院十二人下院六人皆從君之欲者也古之賢君禦敵而勝臨事而成則益恐懼脩省愚而器小者勝敵則長其狂傲之氣反爲不祥顯理與慕北來二丟克皆王之仇也佯附朝廷而合謀叛王人莫能測俄而有以反謀告王者或以爲卽顯理也一千三百九十八年巴力門會議召慕北來訊其叛

狀不承謂訟之者誣之無可證質將相攻擊鬪有日矣王怒流顯理於法地十年流慕北來於異邦終身二人將行請於王曰負罪遠出不幸而親沒則乞使人代理其遺產赦回交還也王許諾未幾蘭加斯德丟克約翰死顯理之父也王不念前諾奪其所有以爲己產此之謂君不君條例新立百姓怨之以其多取於民也又王殺格羅不順人心人咸思亂王猶未知出居阿爾蘭時一千三百九十九年五月三十一日有來告曰主之國其危乎冠冕裂乎玉步改乎主將安所歸乎顯理在法地知國變將作率衆以八七月四日王在阿爾蘭顯理抵英之近郊昧斯莫蘭諾東北蘭二部長逆之從之

者甚衆入倫敦都城無一人禦敵者臣民疾王如仇故莫肯爲盡力王之出也命約克丟克居守約克于王及顯理叔父行也顯理至則棄王歸顯理同一從子亦固其所王聞變大驚八月五日急渡海至威爾士顯理策其必走此先至其地於是降者八萬人王之從者星散僅三四人從入岡威軍壘爲人所獲送顯理顯理見之一膝曲跽面君之禮也王免冠慚謝曰吾弟吾弟予見吾弟子心甚喜顯理笑曰吾主乎予未及期而歸者以吾主之困吾民也二十餘年矣予將代吾主以蘇息斯民何如王曰弟之早歸也予甚善弟心所樂爲者予心亦甚樂焉時顯理已更置官吏命新巴力門遷王于

倫敦使人監守之顯理不掩篡國之非雖得罪倫理而百姓悅之顯理將卽位前一日使人至王處強之作禪位詔九月三十日勞爾德士高門士各議曰是是政府教院諸大臣至宣讀詔書而去顯理又恐此詔人議其非於是更具力查罪狀大書某事當某罪著爲令甲蓋如此則不獨故王自應禪讓卽國人亦得聲其罪而黜之罪狀旣具顯理趨至君位二教大長扶而立之時一千三百九十九年明惠帝建文二年也君非嗣世巴力門援立之于此再見力查在位始授人以世爵出自朝廷用一文書鈐以國璽凡教王之法使人至英黜陟教長等事至力查時一不能行有犯者執其人使捐贖

此法名曰不勒慕尼力言阻彼教之權也相傳至今

顯理第四紀蘭加斯得家

義德第三之統至力查而世絕黑王子有仲弟來阿納季弟約翰之為格拉林斯丟克死無子其女非力巴嗣其產馬爾智亞爾以德門邈的麥者其祖以弑義德第二故產入官後復得之娶非力巴生子羅日羅日子以德門生十年巴力門立顯理英禮女王子女之子王孫其孫王曾孫也俱可以次得國力查廢以德門宜立國人舍之而立顯理無得國之理以德門之後裔與約克丟克連姘故其後在約克屢有兵事當巴力門立顯理告於力查距力查放顯理於外之時僅一年十

月十三日羣臣上冕於顯理顯理即位凡力查弊政悉更而新之巴力門權歸數人之例遂廢顯理長子亦名顯理為噉爾士王亦為英王徙置力查於約克久之王思國家之易得而難守也即位後懼有仇之者防衛甚周其為君也出於不意其始與格羅斯德謀後黨於力查而殺格羅此反覆之尤者故即位後公侯勳戚有惡之者而國人悅之一千四百年正月哉生明有謀誘王至阿斯佛觀勇士相撲之戲因而殺之復立力查事洩叛者易一策聲言以力查為西王百姓聞之大怒自起兵攻叛者殺亞爾等五人力查初不知其謀叛者未一月而敗力查死或云兵死或云餓死其死狀無知者

亦無過而問者然無疑於殺之也陳力查之尸於倫敦大教
 堂示衆有謂其實未死而逃於蘇格蘭者訛言四起王懼不
 安於位率兵伐蘇格蘭不勝一千四百二年九月蘇國亞爾
 斗格拉斯侵英北鄙為英亞爾北爾西等所敗王子在威爾
 士威部之民又叛阿溫格林斗者自言故威王之苗裔也嘗
 至倫敦習名法為力查家臣力查廢遁回威爾士自理其產
 為其鄰所奪阿溫率衆復其產并奪路忝之產時百姓頗喜
 乘亂得以自主遂至大亂彗星見人心皇皇一千四百一年
 二月二十一日高門士會議威爾士人之讀書於阿斯佛堪
 比日書院者俱回本國其民之耕作者亦治軍器回籍顯理

數往征之不服阿溫兵少善戰輒掠官軍牲畜輜重給兵食
 退則負固山嶺百姓立之為威王初馬爾智亞爾邈的麥子
 羅日有弟亦名以德門而其子以德門則宜立為王者也王
 既得國擒羅日之弟以德門其媼家北爾西以金贖之顯理
 不許以其兄子以德門宜為王故疾之北爾西為英部諾東
 北蘭亞爾由是怨王始與蘇人為敵至是與蘇人斗格拉斯
 盟連兵入寇北爾西年老多病其子好德斯伯頗猛鷙命率
 師將往結威部王聞之恐其兵合難制急以兵據是路斯伯
 利城進攻威爾士而斷北寇之來路好德斯伯與斗格率兵
 來爭而威王阿溫未至一千四百三年七月三日王與之戰

好德死斗格被禽北兵大敗而去阿溫為威王為英之勁敵者數年後年齒漸衰兵士漸寡每思避地懼見獲俄而死自此英與威始罷兵王在位巴力門之操權如故當是時羅馬教立一會於英禁西教味格里弗之書強其人歸羅馬教否則大受荼毒或焚死或榜掠死死甚眾一千四百五年北爾西與諾定恒亞爾約克教大長叛英王討平之北爾西遁至蘇國餘二人皆服罪蘇王子惹迷斯年少乘舟往法蘭西讀書英人掩而執之拘於英壘者十八年王之初政百姓甚悅後漸昏耄民有離心身老且病其子又不肖狎昵匪人沉湎淫逸王心尤戚戚焉羣小中有一人犯法法司將加刑王

子聞之馳往怒目而叱曰汝何人敢辱予之從者拔劍欲前殺法司法司命伍伯并執王子下之獄王子始懼而悔罪甘就法焉王聞之大喜以為有臣如此執法忠臣也有子亦能畏法令子也王老病而薨時一千四百四十三年三月三日明成祖永樂十二年也

顯理第五紀

顯理第四既薨而民不哀之其長子立是為顯理第五年二十六既即位民悅之少時喜事故父不授以政至是盡除前習惜未嘗學問法度未明心氣未定然所行之事頗有仁心如力查尸埋淺土改葬於味斯閣斯德院歷代帝王將相所

葬之處出馬爾智亞爾於獄寬蘇王子惹迷斯之禁給還北
爾西入官之產於好德之子遠近大說當是時從西教者
俗名勞拉德士干國家厲禁然非王意羅馬教士言彼為異
端阻朝廷政刑殺毋赦而教中貴人阿德加斯者行義甚高
與王有舊教長欲害之王言宜訊明定罪親詣阿德處勸其
復歸羅馬教弗聽乃去之眾議阿德之罪將焚之臨刑阿德
忽逃去或言阿德將聚眾為亂期以夜王聞之豫為備俄報
眾二萬餘人遣人覘之不過數十人或祈禱或聚語他事謀
反無左驗亦不拒捕悉擒之或縊或焚而阿德竟不獲出賞
格捕之逃至威爾士後四年泊味斯亞爾偵其所在獲之定

阿德之罪以犯法論宜縊死以悖教論宜焚死乃以鐵
索繫其腰懸於火炭上熾而死之或勸祈哀於教士謂
之告解阿德不肯怡然就戮觀者咸為下淚自一千四
百十四年後英法二國兵爭之事暫息文告往來謀其
和約先王臨歿遺言云汝毋使國家久無武事王本有
侈心揚言曰彼法之君位宜屬於我此與前王義德第
三之意同義德之欲為法王也不義茲殆又甚焉如使
義德宜為法王則宜傳於馬爾智亞爾英之巴力門不
立馬爾智為英王亦不能阻之令不為法王蓋英之君
臣未嘗思其事理之當否也時法國大亂法王查爾斯

第六性暴戾有二丟克一阿連斯一白根的爭權互相仇殺更有一族欲立王之子而助之英王見法之亂也乘機欲取其國教士勸之行輸軍實於王王素有威名國人樂爲効力高門士召色爲斯比格踴躍輸將法人不樂戰事又不樂英王來爲之主英兵至絕無備禦查爾斯恇怯不知所爲國中擾顯理使其弟約翰居守命諸大臣襄理國政一千四百五十年八月十日明成祖永樂十三年也大出師伐法舟一千五百戰士三萬自藪坦敦及他海口行三日抵法境圍哈弗旅城月餘乃降英人下痢死傷甚衆士卒離散不能成列前進衆議欲返王恥師出無功違衆繞道命由加勒斯而返

舟行海濱宋河口兵不滿萬見法人陳兵於格里西左右者五萬人師無紀律又無大將主之英人見之氣自倍謀定靜以待之十一月二十五日戰前夜大雨日中鏖兵日加申大敗法人斬王族七人勳爵等八千人軍士死無算勳貴被擒者甚衆俄而軍中籍籍言我後隊爲法所襲王驟聞之慮他變急下令盡誅所擒法人及訛言定而死者已尸相枕藉矣是役也名曰亞人可之戰取其地之相近者名之也軍資器械盡爲英得於是英王率將士從加勒斯回倫敦出師三月奏凱而歸國人歡聲載道鼓樂以迎百姓服王之英武每歲貢納錢糧永爲定例嗟乎疆場之事一彼一此假令法人合

而圍英英未必取勝或至多殺士卒乃法國自相吞噬構釁
蕭牆弗思禦侮以至於此一千四百十七年八月英再出師
四萬伐法軍容甚盛法諾部諸城望風降兵圍都邑破廬昂
至明年而諾全部入英版圖於是進兵攻法之都城巴黎斯
先是亞人可之戰法阿連斯丟克被擒法王子爲主其黨也
與白根的丟克相會其下人襲殺白根的白根的子欲復仇
來附於英巴黎斯人深惡阿連斯人轉利英人之入以紓難
一千四百二十年五月二十一日乞降於英立盟約以法王
女加他鄰爲王妃法王在則王代掌法政死則英王子孫世
有法國十一月法王女來歸王與法女入巴黎斯朝羣臣羣

臣以次書名於誓書遂定法地惟塞納河南方諸部不服起
兵助法王子繼立之爲查爾斯第七維時英與法合爲一國
雖闢土開疆恐亦非英之利也王將回倫敦使其弟格拉林
斯丟克爲巴黎斯畱後挾法王與其女偕行法女後生一子
得立爲王號顯理第六英王旣行蘇王以兵助法王子攻巴
黎斯遂殺格拉王聞而往救之大敗蘇法之兵王年壯氣盛
霸有二土聲施爛然民物富庶聲色自娛無何法王查爾斯
病顯理將爲法主忽得疾以兵至巴黎斯南六十里疾甚竟
薨時一千四百二十二年八月三十一日明成祖永樂二十
一年也年三十四在位十年顯理爲人擅材藝脩威儀與人

接貌復和易，故人多愛之。然其行事造次，果於自用，溺於羅馬異端，頗興渡海之師，以斥絕西教。為盛德事，攘奪土地，以為威加四鄰。自古戰陳之事，咸恃膽力。至王乃以巧詐取勝，風斯下矣。

顯理第六紀

顯理第五死，王子生僅九月，公卿大臣會議於溫薩爾宮，乳母抱王子以國璽繫襁，俾兒手握之，乃令以璽授蓋瑟勒。爾後三月，巴力門集議立一會治國事，推新王之叔父北德福丟克約翰為主。時尚在法地，乃以其弟格羅斯得丟克狼弗立代之。署議以瓦威克為王保傅，王之叔祖波福的為溫

折斯德教長，侈心自肆，與狼弗立爭政，日相構難。國人惡之，法王死於英誓書，言英王宜有法土，故刻印曰顯理法蘭西英吉利王阿爾蘭主。然法王故有子，號查爾斯第七，雖無材能，於理宜得國。故國人助之一千四百二十三年，英釋蘇王子惹迷斯歸國，與之約曰：汝民毋助法為惡，惹迷斯未返國前，娶波福女善英。太后加他鄰為之主，婚將結，歡為他日計。太后後私嫁於阿溫都鐸爾，後其孫為一朝之祖，稱曰都鐸爾家。顯理第五之弟約翰仍掌法政，軍國大事咸屬焉。其膽力亞于兄，而相業甚隆。文武功德勝乃兄矣。參佐輩有數亞爾色力斯伯力瓦威克薩佛亦甚有名譽，又有名將大爾泊

助之法王子查爾斯第七來攻戰於格里方又戰於弗謬爾
法人大敗死傷甚衆勢遂不振羅爾河以北悉降於英英人
渡河而南一千四百二十八年明宣宗宣德三年秋英人圍
阿連斯此壘若下則法之腹地英可盡有乃英戰勝之事至
此而止勢如怒潮來而忽退則以法入中有古今未有之奇
女子爲之卻敵也女名若安生於亞爾格族本卑微幼時嘗
牧羊至是英人來攻焚掠村市民罹其害女目擊心傷身不
顧一弱女子欲救民於水火自言於衆曰神立我俾我
克敵爲汝等除害衆聞而駭笑之女堅自信人言始息
往見查爾斯先是查爾斯兵敗收聚二三千人謂之

孤軍查爾斯曰吾惟恃孤軍此再不勝大事去矣聞女至大
喜遽見之卽以女爲孤軍督女戎服登壇慷慨誓衆阿連斯
圍甚急城中食垂盡將降女提孤軍往英兵圍城者分左右
翼女出奇計長驅中道入城給兵食守益堅是役也雖將校
用命而人以大功歸之女于是聲名洋溢法人以女爲神
所命而英人視之則魔鬼也法人有恃踴躍百倍轉擊英人
英人懼遂退時一千四百二十九年五月八日也於是號女
曰阿連斯之女女每戰身先士卒屢勝英人擒英大將大爾
泊轉戰三月法之兵威大振於是立查爾斯爲王明年春女
爲英人所獲下獄訊之定其妖妄之罪竟焚死法人聞之歸

英圖志
罪英之報怨然而訊女之教士皆法人也其焚之亦以爲教中異端故治以教例教主聞之甚悅查爾斯賴女得立女死難不能報真庸主也後數月英人以王入巴黎斯爲法王時年十一冀民之從查爾斯者轉而從顯理然以英人理法政欲如在本國之持久難矣白根的丟克去英而歸查爾斯一千四百三十五年英北藍大日奈朝之政不行於法是年北德福丟克約翰死明年巴黎斯復歸於法王已先回倫敦矣二國戰事暫息者十五年後復起兵相攻一千四百四十九年明景泰四年法人以兵收復廬昂明年又復舌爾布諾之全部復歸於法法人兵過哥地納又三年復波爾多於是自

加勒斯外英人無尺土是爲英人欲兼并法地之終事英之圖法最非義貽禍於民甚烈自此二國恒有離心至今日而始睦鄰修好焉王年已長性懦而闇遠遜先朝時有二人爭權一王諸父狠弗立一王從祖波福其黨日相攻擊波福身爲教長復尚王璽而處心積慮以圖執政惡狠弗立使人告其妻爲巫蠱之術訊於大廷俾自誣服遂下於理瘐死獄中王年二十三歲議婚欲以馬加勒爲后其父理泥人稱之爲西西里耶路撒冷王又稱爲安如買云巴爾丟克以其曾爲此職也波福利王納之使薩佛亞爾往聘焉狠弗立不欲婚議定將以安如諸地授理尼國人聞而惡之一千四百四十

五年納后禮成愚闇之主受制於才能忍鷙之后入宮後與波福合謀仇狠弗立後二年使羣臣發其罪下之獄無何狠弗立之尸出於獄人皆知后與波福殺之也狠弗立性行淑均才德並著國人哀之波福年老家富居恒歎泣曰余多財奈不能買生命何臨死以家財施於教會冀贖平生重罪嗟佛後爲丟克后德之授以相位英民凋敝人咸咎其無才且以殺狠弗立爲彼罪益怨之起而告訐於巴力門王與后俱不能救乃放之異邦至加勒斯見一大航招之使上其人笑曰汝叛人也嘲弄良久呼小舟至執而誅之狠弗立之寃乃雪根的之民見國中君相昏闇遂起兵反破倫敦王及后奔

於革尼空軍壘叛者肆行劫掠國人怒而誅其亂首王愚而無子如使狠弗立得立國中可無兵革之事自此終王之世國中若無王惟一戰場而已王身心無主或有一隙之明人勸之頗納后私專國政法土盡喪國人咸歸咎焉后本法女太后亦法王之女英人流毒於法故以孱懦之王凶狡之后亂英王病卽染其外祖法王查爾斯第六之症天道循環無往不復此之謂矣北藍大日柰力查者爲約克丟克民望甚重狠弗立死力查宜得國其得國之理較王尤正力查爲義德第三第五子後顯理乃第四子後力查母安邈的麥爲義德第三之第三子馬爾智亞爾之妹亞爾死無子位宜在力

查力查具文武才軍國大政咸理功德甚茂宜君其國蘭加
斯德家爲巴力門議會所立已三世若王誓以善政治民民
亦服之非此后之凶狡不至於易朝也王納后八年無子民
亦不願王有子乃忽生一子名義德瓦王既有子力查不克
嗣位民心惴惴恐王死子少母后專政欲得力查爲主后寵
索美塞丟克力查黜索美塞下之獄一千四百五十四年巴
力門見王有心疾推力查攝國政以待王之疾愈後數月王
疾愈納后言黜力查而任索美塞自此權勢相傾日謀攻伐
國分二黨一黨王一黨力查有在園中互相譁難者王之黨
折紅玫瑰一力查黨折白玫瑰一適有見者令人效之後兩

軍對壘亦以紅白花爲標幟遂名曰紅白花之戰凡王之黨
貴戚咸屬倫敦之民及他百姓從力查力查黨有二顯爵尼
微爾力查爲色力斯伯力亞爾其子同名爲瓦威克亞爾瓦
威克麾下人衆聲勢頗盛二黨相仇歷三十年十二大戰王
之左右略盡貴戚咸殞一千四百五十五年五月二十三日
兵始交王師遠燿索美塞死王被虜力查不忍於其君待王
無失禮於是國人復以力查攝政后心懷忿憤陰爲掣肘明
年后挾王復辟仍黜力查力查之黨退居於野以王左右聲
言報復也又聞后將使人掩執之乃早爲備一千四百五十
九年九月二十三日色力斯伯力人大敗王人後月王師襲

力查軍將有降者，遂敗力查。后大悅，召巴力門至哥溫的集議。凡力查之黨，削爵奪地，入官有差。明年，力查黨瓦威克亞爾率其屬與王人戰，大敗王師。后與其子奔蘇格蘭，王仍為所獲。力查仍待之如初，以是知力查忠厚，無甚過惡。乃未幾而禍作為可傷也。巴力門議棄哥溫的之律，力查謀自立，至上院君位前立而手案其上，以覘衆心。越數日，乃召大臣令推戴為王。衆議力查本有得國之理，故以約克家為宜立，而并望其後嗣為君。王在位已三十八年，暫遜位後復為君。終其身，王亦願退避，后大怨憤，以其夫失位，則其子必被逐，不得立矣。蘭加斯得人起兵，擁后攻力查。北方人悉助之力查。

兵少，召其黨來援，援師未至，敵入境，倉猝往禦之，大敗見殺。北方之師支解，力查懸首示衆。此一千四百六十年。西歷歲除日事也。力查次子亦死，色力斯伯力亞爾及諸勳貴多有被僇者。后殘忍好殺，其黨自相疑貳。力查長子義德瓦繼立於約克，聚兵威爾士界，聞變遂於明年二月一日率師敗蘭加誅其首領。後半月后以北方之師入倫敦，敗瓦威克亞爾。取王出倫敦，人本服瓦威克，又怒北兵淫掠，惡后遂與義德兵合，后復出奔義德，與瓦威克復入倫敦，國人大喜。義德幼而果敢勝父，即昌言顯理昏弱，且在仇人之壘，不可辱社稷。我當立國人，以其年少膽智，遭家不造，甚愛憐之。又畏后之

橫暴故遂立之一千四百六十一年三月四日即位號義德瓦第四時顯理為王三十九年矣前已失法蘭西世產及其父法王之位茲再失英國已誠憤憤且以后之凶狡故也當是時國中立二法一王死國母不得彊以公侯勳爵為夫必大臣議可乃聽一凡百姓得選入巴力門議會者每歲產必值今三十金以上此例至道光十二年重修律令時改正

義德瓦第四紀

約克家

義德第四即位時年二十雖為君未遑佚樂北方有蘭加斯得為難思為顯理復仇者六萬人義德聚眾於瓦威克自倫敦往征之先以千人小戰乃大出師對壘兩家數相當一千

四百六十一年三月晦日大戰於約克晨起兵進天雨雪眯北兵目持弓者不能視日加申大敗北兵死者一萬八千人收約克地顯理與后及其子奔蘇格蘭義德歸至倫敦君位始定六月二十二日即位封仲弟若爾曰以為格拉林斯丟克主阿爾蘭部季弟力查以為格羅斯得丟克督水師十一月巴力門集議明年三月四日上冕盡驅顯理及其后之黨出境蘭加斯得之產入官賜約克諸大臣此時紅玫瑰花落矣馮加勒后勝則驕而好殺敗必竭力以圖報復義德嘗謂之曰吾畏此人凶狡無比視蘭加諸勳爵尤可畏焉后求助於蘇王不聽乃往法蘭西徵兵糧法王路易第十一命不里

達尼丟克稍與之送之返一千四百六十二年秋后歸至諾
東北蘭侵英北境瓦威克率師追殺后復奔而顯理已有入
引至滅爾士矣傳聞后與其子冬日野行為盜所劫盜分贓
時后匿于林中有一逸犯見而欲迫之后飢寒困頓泣謂之
曰余王之后此子王子也母子二命以乞汝其人慨然匿而
飲食之導之奔復至法部冀法人助之莫有應者乃逗留於
彼蘭加雖敗而子遺之民猶思報復有引顯理至英北境為
羣叛者主一千四百六十四年北方復叛軍中無善戰之士
勢亦微弱王起師滅之自此顯理往來於寂寞之區或止入
家或伏山洞後一年人偵其處獲之視同罪囚顯理心疾更

甚人加以楚毒亦不知繫其足於瓦威克馬腹下徇倫敦市
中禁觀者毋得憐之既乃閉置軍壘鎖壘門絕其出入王自
即位後尼微爾父子佐命瓦威克相繼執政王亦能為君然
稍喜宴安故悉委以政瓦威克出入將相位高祿重次弟約
翰為諾東北蘭亞爾北爾西入官之地悉以與之季弟若爾
日為教大長居頃之君臣忽相猜忌而國大亂義德納烏德
非女為后曰以利沙伯發也前夫格來為蘭加將校與約克
家戰敗而死產入官人言義德出獵近后父之壘后携小兒
求以父產賜之義德悅而納之時一千四百六十四年五月
一日也國家多難不告於大臣倉猝成事國事定始言予已

納后明年遂正中宮，悉官其父兄弟。后族本微，驟貴，諸勳舊皆怨望。瓦威克亦以此積忿，然未顯言。后族譖於王，謀危瓦威克。一千四百六十七年，瓦威克以王姬下嫁事有違言，遂自朝歸。有爲之講解者，君臣面和，終不釋。後二年，瓦威克以女嫁王之弟格拉林斯，丟克於加勒斯。王惡之，於是猜嫌益甚。時北方不靖，以困於征輸故也。叛首雖誅，而勢家助之，更立一人爲首，揚言后族宜離王所。國家重斂於民，后爲禍始。且后之母女巫也，羣叛者以瓦威克名號召徒衆歸之者甚衆。王不能禦，告急於加勒斯。使瓦威克格拉林斯來助之。未至，后父與其弟見殺。王見瓦威克格拉林斯至，且喜且

懼。瓦威克命叛者退，而拘王於已壘。是時縲絏中有一王，紅白玫瑰花俱落矣。國中大亂，瓦威克與王和，釋王出，諭安民。大赦事稍定，而王之忌心益熾。一千四百七十年春，明憲宗成化六年也。北方林岡之民又叛，亦以有司暴斂爲名。瓦威克格拉林斯二人復陰助之，計未成。王師討平之，獲叛者訊之言，實受指使於二人。王怒，將加罪焉。瓦威克格拉林斯奔法蘭西。時法王路易十一入朝，二黨以仇敵相見。馮加勒后見瓦威克恨其助逆篡國，使已家破而無所歸也。瓦威克亦怨后之殺其父，而禍皆緣義德起，咸歸咎義德。法王爲之解紛，二黨俱和。瓦威克恨義德負之誓，復立顯理，以其次女安

嫁馬加勒子立約嗣位後若無子立格拉林斯格拉林斯以已位次當繼義德今反在馬加勒子後心忿忿一千四百七十年夏議興師入國王聞之不爲備有奸人誘之往北方國中空虛無可禦敵九月十三日瓦威克格拉林斯至伯來謀海口瓦威克雖去國而勢位猶未失也長驅入國國人見其至歸附之兵不血刃而君位已易王力不能戰遜於荷蘭王后避居味斯潤斯德會堂生一子即義德第五前已生三女矣瓦威克命出顯理於壘復其位召巴力門議以義德所奪之產歸於瓦威克黨瓦威克權勢熏灼置君如奕然不期年而敗義德在外力思報復人憐而助之入一千四百七十一

年三月十四日約克號召百姓從之者如歸市自北而南道路無阻一如瓦威之自南入也格拉林斯在內本有貳心至是革面去紅玫瑰就白玫瑰迎其兄而拒其妻父使人謂瓦威克曰我將使我兄與汝和我爲調人瓦威克怒而斥之曰汝去丈夫惟踐盟之是重詎意汝主乃背誓忘義之徒耶蘭加斯得部與約克部時約克部歸於義德兩軍相遇於巴爾納爲倫敦北郊夏四月戰蘭加人大敗瓦威克見殺家產盡失黨遂以衰將戰馬加勒后率其子及新婦次於伯來謀冀國人來迎歸國復位聞敗大驚知事不可爲避入教院欲返法地蘭加人收其潰卒至威爾士勢將復振義德連兵截殺馬加勒后

與子婦並獲軍士擒顯理子見義德義德問曰汝來奚爲慨然對曰將繼吾父之位復先世遺業耳義德怒取大梃擊之左右羣起殺之監押后及新婦隨義德入倫敦明日顯理尸橫於保羅聖殿義德殺之也自此終義德之世亂較定羣叛者或死或遁漸次漸滅王分封其子爲威爾士君國政委於羣臣深居宮中自耽佚樂馬加勒后在縲紲中五年法王憐而贖之其子婦安格羅斯得欲娶之而分得其父之產格拉林斯既納其姊謀得其父全產故兄弟交惡數月間忽不知安之所在後有見其衣小家婦服者王聞而命格羅斯得娶之王愛格羅厚其祿入以格拉林斯本瓦威黨雖有迎立功

心銜之格拉亦內愧時恐加害王時行法於人以懼之有妄言者卽坐以罪不少假借伯爾達犯法將刑格拉林斯素與之善率爾言曰如是則枉法矣王遽怒并執格拉林斯下令刑官定擬遂殺之王嗜酒聲色過度一千四百八十三年四月九日暴薨時明憲宗成化二十年也年四十二歲在位二十三年王雖嗜殺而暴然兵威克立民亦從之前王彊貸於民許以償期至是召大臣議征民賦不盡由巴力門定議矣

義德瓦第五紀

義德瓦第五年十三國人立之在位兩月餘變故頻仍大奸亂政尋至失國國分三黨一太后烏德非之黨乘其子年少

欲專政一約克家黨格羅斯得伯金恒二丟克哈斯丁厚亞
得斯丹立三勞爾德等與太后黨爭權中亦有異同哈斯丁
以格羅爲叔父之尊固宜輔政而其心未嘗不忠於幼主格
羅斯得漸萌異志伯金恒助之欲盡去太后黨及哈斯丁等
先王薨少主在威爾士亞爾利弗斯勞爾德格來太后戚屬
故輔之格羅斯得在北方聞喪各趨入倫敦少主行至斯達
德福格羅行至諾丹登二地相去甚近伯金恒夜見格羅定
逆謀明日格羅謁少主於行在從者衷甲執利弗斯格來及
王之左右囚於己壘太后聞之懼率其幼子五女匿於味斯
閔斯德教院哈斯丁不之備謂此第削兩人之權耳五月四

日格羅以少主入倫敦外盡臣節未朝賀卽置之壘中國人
悅大臣推格羅師保少主一日格羅於議政所廷執哈斯丁
未定擬遽殺之大臣之忠直爲國者下之獄云將謀已也遣
人殺利弗斯格來等於壘又使人至教院索少主之弟約克
丟克太后不可強逼出之命與少主同居陰令教士訓於民
曰先君淫泆其子不可以承宗社百姓聞之不爲動伯金恒
亦以此誘衆弗聽則直言宜奉格羅爲王衆莫有應者一亡
賴起而言曰力查王宜萬歲伯金恒大喜六月二十六日僞
作百姓連名冊告於格羅曰羣小民謹奉汝爲君敬上尊號
格羅佯遜謝曰不敢不敢旣而曰旣爾有衆咸奉予使予牧

養元元子曷敢違天命遂卽位

力查第三紀

格羅斯得爲王號力查第三立其妻安爲后時一千四百八十三年七月六日爲明憲宗成化十九年也大行賞於其黨求和于國人之仇已者去倫敦而巡行國中義德第五及其弟囚於壘惟守卒與陰行刑者得見之太后在教院以兵守之毋許外人通言語力查巡英西境陽以好言撫民非實也至約克復行卽位禮稍寬義德兄弟之禁有欲救之出使少主復位計頗洩時伯金恒亦有違言俄傳義德兄弟已被害蓋力查必欲殺義德兄弟以固已位而衆人必欲救之事不

刑之字形之誤力

密反速其死其死也當夜分以枕衾壓二人首俱氣絕救者事不果將有他圖衆見力查之弑其君也意不平合而圖力查約克家之宜立者義德第五女兄以利沙伯義德兄弟死當得國力枝門亞爾顯理者其父阿溫都鐸爾納顯理第五之后其母乃蘭加斯得丟克約翰曾孫女也出奔在法部人謂以利宜嫁之匪寇婚媾國人將助之以與格羅爲難約數部同日起事期以秋顯理返自法國羣不逞從之風阻不克渡海伯金恒叛格羅收兵威爾士霖雨河水泛濫道失期不克與顯理合兵他部兵亦不出事中止伯金恒爲人告發力查使人殺之盡以叛者之產入官力查求和其民去先王厚

養元元子曷敢違天命遂即位

力查第三紀

格羅斯得爲王號力查第三立其妻安爲后時一千四百八十三年七月六日爲明憲宗成化十九年也大行賞於其黨求和于國人之仇已者去倫敦而巡行國中義德第五及其弟囚於壘惟守卒與陰行刑者得見之太后在教院以兵守之毋許外人通言語力查巡英西境陽以好言撫民非實也至約克復行即位禮稍寬義德兄弟之禁有欲救之出使少主復位計頗洩時伯金恒亦有違言俄傳義德兄弟已被害蓋力查必欲殺義德兄弟以固已位而衆人必欲救之事不

密反速其死其死也當夜分以枕衾壓二人首俱氣絕救者事不果將有他圖衆見力查之弑其君也意不平合而圖力查約克家之宜立者義德第五女兄以利沙伯義德兄弟死當得國力枝門亞爾顯理者其父阿溫都鐸爾納顯理第五之后其母乃蘭加斯得丟克約翰曾孫女也出奔在法部人謂以利宜嫁之匪寇婚媾國人將助之以與格羅爲難約數部同日起事期以秋顯理返自法國羣不逞從之風阻不克渡海伯金恒叛格羅收兵威爾士霖雨河水泛濫道失期不克與顯理合兵他部兵亦不出事中止伯金恒爲人告發力查使人殺之盡以叛者之產入官力查求和其民去先王厚

斂之政以利沙伯將嫁顯理力查深忌之陽與和好出先王
后於教院使其長子娶以利沙伯長子死力查益厚遇以利
沙伯未幾后安亦死人謂力查將納姪女而毒殺其妻大臣
之忠正者諫之而以利及其母俱樂從之當是時顯理在法
部其黨在英同謀舉事約克族謂顯理若得志後娶于其族
爲后則助汝乞師于法王亦許之一千四百八十五年春義
師起力查聞變大治軍食徵糧於民民不堪命八月一日顯
理起兵數日至英西境率其黨千人外邦人助之者二千過
威爾士無阻者及英界達泊得亞爾率其屬從之軍容更盛
力查以威脅民使禦敵復虞其變故兵多於顯理而咸懷二

心力查之用兵也驕謂此師若敗我則死之卒踐其言秋八
月二十二日戰力查冕服立馬指揮軍伍隊忽散有歸顯理
者有退不戰者勞爾德斯丹立有兵三千本力查黨力查忽
見其在對陣大驚憤絕馳馬大呼突陣欲殺顯理忽墜於地
羣刃之遂死將士取其冕以冠顯理齊呼萬歲以馬橫力查
尸於其上豪葬於野力查第三之死爲北藍大日奈朝之終
顯理第七之立爲都鐸爾朝之始紅白玫瑰花血戰三十年
至此而止其間王侯五等破家亡身或兵死或野死或逃亡
發遣產盡籍沒此國家氣運之一大變局也貨物狼籍商賈
不行惟百姓不盡傷害君上之權漸失而扶達爾之法奴隸

約束亦不及前矣

北藍大日柰朝三百五十年間、小民漸自拔於諾曼朝、爲扶達爾服役之法、國中律法多有更定、抱冤之民得以申理、凶暴者刑及其身、制度之善自此始、從約翰所立之條例、前此君民相持不定、自此益固、有大議會得代民申意、王及勞爾德士高門士二院三者合一始行、卽王或任意更張、而布在方策日久、政復如故、巴力門議會初無定所、至義德瓦第三時始立爲味斯憫斯德院、有司聽兩造訟、始令如力代證、枉直如力者、地方良民也、前此僅問與罪人有無認識、至是乃克與擬賞罰、告於問官、官卽依擬施行、絕無枉濫、此法制之

外更爲良法也、然當是時君多好武、出兵於外國、中或叛亂、公卿大臣把持大政、或與其君樹敵、貽禍於民、道路多梗、犯者得逸、法令不行、深林密樹中藏奸宄、飢寒作賊、五等自立、黨羽不遵憲度、互相吞併、海上平時亦多劫盜、特國家雖多故而英地在歐州中、猶爲平康之國、師船足備、前此惟國王自爲置造、嗣七海口名新克者、各造船以供王用、王亦予民以恩澤、在一千二百二十九年、見有師船七十二、水手一千五百十二人、少年子弟七十二人、國中物產最重者、羊毛及皮毛、視他國尤細美、此外鉛錫、雞毛、蜜糖、魚槍、礮、火藥、貨入外國者、布、酒、菓、香料、絲、礬、金、銀、寶玉、商賈各有定約、以利貿

易大呢始惟有粗者王招比利時工匠來國織之染之漸加細密凡厥士庶材藝有精有粗有巧有拙及其究竟遂爲後來定法考象緯者必推其驗於災祥此大謬也然賴此而人益勤於測候方士徧覓延年卻死之藥千百年中曾無一二活人之方黃白點化之術者然由此而益明物之本質舟人歷險不驚行海極遠有羅經以指南也羅經在一千二三百年間歐洲人始知之一千四百年後始用之自鳴鐘亦出此時凡諸造作所最要者義德瓦第四時英人加斯敦自以大利北方始鑄版印書嘉惠學者不淺宮室制度益精鐫像於石益巧國中王公貴人暇日皆喜禽獵嬉戲習尚然也自古

語言文字屢有變易此時國人半習薩索尼語末年始操本國舊音教中風俗大變士民不識教書惑於異端說者謂此朝前半爲教王行權之午時午陽之盛也百姓愚闇之子時子陰之極也後半百姓稍有知識王與巴力門漸拯民於教王虐政深恨前君臣首先陷溺其民而授教王以權也爰立學舍書院教民禮義使民神智日生不囿於邪說自此教王之權漸衰民風蒸蒸日上凡此皆用土語以譯教書之功也故百姓易曉且以道理與教王之法較其優絀於是多有去教王而遵道理者

英王而數戰於

英王而數戰於

英王而數戰於

英王而數戰於

英王而數戰於

英王而數戰於

英王而數戰於

英王而數戰於

英國志卷之四終

